

# Tí xroon tsíkjin ch'ín Pablo chr'énhen ch'án tí sín chjasin Colosas

*Ch'ín Pablo ikjin xroon k'uáyéhe tí nínko chjasin Colosas*

<sup>1</sup> Janhan Pablo tsíkjeýána Jesucristo t'aha ch'án xra kixin xikaha tjinkaon Dios, la ko kichó ni Timoteo <sup>2</sup> mé ikjinni tí xroon i tsochr'ánharáni tí jahará tsíkjinchetjóará Dios la ko kuítekáonrá Jesucristo tjejorá chjasin Colosas. Kjuasáyé It'eni Dios chrókjuintayaonrá kixin kjuaxróxin chrók'uejorá.

*Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo*

<sup>3</sup> Jnkochrín tjancheheni kjuasáya Dios la ko tjanchiani kixin chrókuinkitsa ch'án tí jahará mé jehe ch'án It'é Ìnchéni Jesucristo. <sup>4</sup> Ó kuínhinni kixin jína tinkachónkirá Ìnchéni Jesucristo la ko tjuèhéra kaín tí sín ó tsíkjinchetjóá Dios. <sup>5</sup> Mé xikaha tjejochonhénra kixin ts'ayéhéra tí nkehe chóna Dios tjen nkaya nkajní. Jahará la xikaha tjejochonhénra kixin tjejotinhínra tí tan chaxín kuènte Dios tsaáxinni. <sup>6</sup> Tí tan i mé kuínhin chóni la itsjé sín tinkáki tekaon sín la tinkák'ánki tí kjuachaxin kuènte Dios kuenté chjasintajni. Mé xikaha kónhen tió kuínhínra la ko kuítekáonrá kixin chaxín tjuahará Dios. <sup>7</sup> Tíhi mé kjuakohará kichó ni Epafra. Jehe ch'án la jnkokoá kjuích'ekoni ch'án xra kixin jehe ch'án la jína ch'ehe ch'án xra

Cristo kixin xikaha tjinkitsa ch'án tí jahará. <sup>8</sup> Jehe ch'án mé kui ch'án ntihi chrónka ch'án nkexrí tjuèhérá kichuára kixin Nchakuen Dios tjinkitsa tí jahará.

<sup>9</sup> Méxra xikaha tí yaon tió kuínhinni nkexrí tjejorá la títoehyani tjancheheni Dios kixin tsjinkitsa tí jahará kixin tsonohará jína nkexrí tóxrjínhin ch'án la ko tjanchiani kixin tsjanjon ch'án kjuachaxin kixin tsiénxinrá kaín nkehe kuènte ch'án. <sup>10</sup> Tjancheheni ch'án kixin jína chrók'uejorá kixin tinkachónkirá Inchéni la ko chrókuítóehyará chrókjuich'erá éxí tóxrjínhin tí jehe ch'án. Ntá jína chrókjuachará chrókjuich'erá xra kuènte ch'án la ntá chrókónohará jína nkexrí tjen Dios. <sup>11</sup> Tjanchiani kixin jehe ch'án chrókjuinkitsa kixin chrók'uejorá fuerte kixin tí kjuachaxin jié kuènte ch'án kixin ntá chrókjuachará la kjónté ichrén nkehe chrókónhanrá la chrókóninkákonhyará. <sup>12</sup> La ko chrókócháhará chróchjehérá kjuasáya It'éni Dios kixin kjuanjon ch'án kjuachaxin kixin ts'áyéheni tí nkehe tí tjen tí t'inkaséyan mé tí nkehe ts'áyéhe kaín tí sín tsíkjinchetjóá tí jehe ch'án. <sup>13</sup> Jehe ch'án mé kuakitsjekjanxínni ch'án tí sítié la ntá kjuanjon ch'án kjuachaxin ts'ejóni tí t'etóan tí Xjeen ch'án, tjuèhe ch'án. <sup>14</sup> Jehe ch'án kjuínchekaáni ch'án kixin k'uenyákonhenni ch'án la tí ijnié ch'án mé kjuenka ch'án tí ijiéni.

*Kjuaxróxin ts'ejókoni Dios kixin k'uenyákonhenni Cristo*

<sup>15</sup> Éxí tsjehe Cristo mé xikaha tsjehe Dios kjónté xitjahya t'ikonni tí jehe ch'án. Cristo la ó xráxín

tjen tí naxa t'ónahya ninkehó. <sup>16</sup> Kjuachaxién tí jehe ch'án kjuích'énaxín Dios kaín tí nkehe siín nkajní la ko chjasintajni la ko kaín tí nkehe naxa t'ikonhyani la ko tí nkehe ó t'ikonni. Kjaxin kaín tí sín ángel t'etōan la ko chóna kjuachaxin la mé jehe ch'án kjuích'éna ch'án kixin sich'ehe sín ch'án xra. <sup>17</sup> Cristo la ó xráxín tjen kjónté naxa t'ónahya ninkehó la jehe ch'án t'ayakonhen ch'án kaín nkehe siín kixin tí kjuachaxin kuente ch'án. <sup>18</sup> La kjaxin jehe Cristo mé tí kja t'etuenhen tí cuerpo mé tíha mé tí ninko. Jehe ch'án senó xechón ch'án kixin jehe ch'án mé ts'etuenhen ch'án kaín nkehe siín. <sup>19</sup> Dios tjinkaon chróchjéhe ch'án tí Xjeen ch'án kjuachaxin éxí tí kjuachaxin chóna tí jehe ch'án. <sup>20</sup> Kjaxin tjinkaon Dios kixin kjuachaxién Cristo chrók'uixin kjuaxróxin nkuíxín mé chjasintajni la ko nkaya nkajní. Mé xikaha tsjasin ch'án kjuaxróxin kixin jehe ch'án kjuák'enkáni ch'án ntacruz ik'uén ch'án.

<sup>21</sup> Jahará la ósé ikjín k'uék'ejorá la k'uéninkákonhénrá Dios kixin tí nkehe jínahya k'uékjich'erá. A ntá jie la kjuaxróxin tjejokoará Dios <sup>22</sup> kixin k'uenyákonhánrá Cristo, kjuasóte tí cuérpoé ch'án. Mé xikaha kónhen ch'án kixin ntá tsjanjon ch'án tí jahará ts'áyéhe Dios kixin kjuíntatjórará ch'án, a ntá jie la chontahyará ninkehó jie. <sup>23</sup> Méxra xikaha chrókuitoéhyará chrókuinkachónkirá Ìnchéni la ko chrókuitoéhyará tí nkehe tjejochonhénrá kixin ó kuinhínrá tí tan tsaáxinni. Tí tan i mé ó chrónka chojni kuenté chjasintajni la ko janhan Pablo kjaxin tjínkítsa xrjanka xikaha.

*Ch'ín Pablo ch'e ch'án xra kuènte nínko*

<sup>24</sup> Méxra ijie la tjasótexinna kixin tí jahará la chàna kixin xikaha mé tsjintaxín tjasóte janhan kixin tí nkehe t'itjáyán tí naxa chrókjuasóte Cristo kixin jehe ch'án mé kjuasóteyákonhen ch'án tí nínko mé tí cuérpóé ch'án. <sup>25</sup> Mé xikaha Dios kjueyána kixin sit'a xra kuènte nínko kixin xikaha tí xra k'uetuanna ch'án kixin ntá jína chrók'uejoxinrá tí jahará kixin chrókjuintaxín chróxrjankaxián tí itan kuènte Dios. <sup>26</sup> Tí nkehe ninkexró k'uénoehya tjemá ósé nchónhya nánó a ntá ijie kjuínchenohe Dios kaín tí sín tinkáchónki tí jehe ch'án. <sup>27</sup> Dios tjinkaon chrókjuinchenohe tí jehe sín tí nkehe tjemá náxrjón tjete ts'áyéhe tí sín jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejochonhénrá ts'ayéhérá tí kjuachaxin jié kuènte ch'án.

<sup>28</sup> Jeheni mé chronkaxínni nkehe kuènte Cristo la nchextraxinkaonni kaín chojni la ko tjakoheni sín kixin chrókuienxín sín jína. Ntá jnkójnko sín chrók'uánkí kjuaxrexinkaon kuènte sín kixin tinkáchónki sín ch'án. <sup>29</sup> Méxra xikaha tí xra it'a la kaín asenná it'a xra tí kjuachaxién chjína Cristo.

## 2

<sup>1</sup> Tjínkavan chrókónohará kixin nchónhya xra kjuít'a kixin chrókjuínkítsa tí jahará la ko kjaxin tí sín tjejó chjasin Laodicea la ko kaín tí í so sín naxa t'ikonhya tí janhan. <sup>2</sup> Tjínkavan kixin jehe sín chrókóchéhe asén sín la ko jnkokoá chrókjuenkayáxin sín chrótjuèhe sín kichó sín. Mé xikaha chrók'uánkí kjuaxrexinkaon kuènte sín chrókuienxín sín jína kixin ntá chrókónohe

sín tí nkehe ninkexró k'uénoehya kuènte It'èni Dios, mé Cristo tíha. <sup>3</sup> Jehe ch'án chóna kaín xín kjuaxrexinkaon kuènte Dios la jehe ch'án mé nohe ch'án kaín nkehe. <sup>4</sup> Kaín tíha xrjanka kixin ntá ninkexró chrókjuít'ayahyará tí jahará kixin tí náxrjón chrónixja sín ó. <sup>5</sup> Kjonté tjenhya tí cuerpo kuèntana tí tjejórá la ntá nchakuenná la mé tjen ntiha kixin xráxinkavan tí jahará la chàna kixin t'íkuan kixin jína tjejórá naxa tinkachónkirá Cristo.

<sup>6</sup> Méxra xikaha kuinkachónkirá Ìnchéni Jesu-cristo la mé xikaha jnkokoá chrókjuenkayáxinkoará tí jehe ch'án. <sup>7</sup> Éxí ijnko nta tsíkji nuèè ninka mé xikaha chrókuinkachónkirá tí jehe ch'án éxí kjuakohará ch'án la ko chrókjuancheherá Dios kjuasáya jnkochrín.

### *Cristo tjanjon ijnko ntia nixin*

<sup>8</sup> Chrókjuítóéhyará kixin ninkexró chrókjuít'ayahará kixin tí nkehe ntoáhya chrókjuakohará sín. A ntá jehe sín chrónkahya sín éxí tjinkaon Cristo. Náhi. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuènte tí nkehe jínahya siín chjasintajni.

<sup>9</sup> Kaínxín kjuachaxin chóna Dios mé chóna Cristo kjonté k'óna ch'án chojni. <sup>10</sup> La jahará chontará kaín kjuachaxin kuènte Dios kixin ó tinkachónkirá Cristo. Jehe ch'án t'etuñhen ch'án kaín nkehe siín la ko t'etuñhen ch'án kaín nchakuen t'etoan. <sup>11</sup> Kjaxin tió kjuankíxinrá tinkachónkirá Cristo ntá jehe ch'án kjuanjon ch'án jnko xroye k'uayéherá kjánchó jehya tí xroye kuènte tí cuerpo. Náhi. Kjuakjìn ch'án

tí j̄ie k'uékóxrjínhanrá la kjuíntakaará ch'án, mé tíha mé tí xroye kjuanjon Cristo. <sup>12</sup> Tí kuíkiterá jahará mé x̄ikaha éxí xravákoará Cristo. Ntá ó xechón tí jehe ch'án la k̄jaxinrá xechónrá kíxin ó kuítekáonrá tí kjuachaxin kuènte Dios kixin Cristo la ó xechón ch'án ínaá. <sup>13</sup> Jahará ósé la éxí tsík'en asánrá k'uék'ejorá kíxin tí j̄ie k'uéchontará kíxin k'uéchonhyará Dios la k'uéchontahyará xroye kuènte ch'án. A ntá ijie la éxí xechónrá kíxin Cristo kjuatsen tí j̄ie chontará. <sup>14</sup> Mé Dios kjuatsen ch'án kaín tí nkehe tsík'etoan ch'án ósé kjuachahyani nchexiteyáni la ko kjuatsen ch'án kaín tí j̄ie k'uéchóntani kíxin Cristo kjuák'enkáni ch'án tí ntacruz la x̄ikaha kjuatsenxin ch'án tíha. <sup>15</sup> Cristo k'uenyákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchónta tí nchakuen jínahya kíxin jehe ch'án kjuínchesuèhe ch'án tí sín jínahya noxín kíxin jehe ch'án mé kjuacha ch'án.

### *Tjéyará tí nkehe síin nkaya nkajní*

<sup>16</sup> Méxra ninkexró chrókjontahyará kíxin tí nkehe chrókjónterá ɔ́ tí nkehe chrók'uirá ɔ́ á tjíkosáyehérá tí yaon kia ɔ́ tí nitjó n̄ixin ɔ́ tí yaon t'ok'éheni. <sup>17</sup> Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha. <sup>18</sup> Méxra chrókuítóéhyará kíxin ninkexró chróntáchro sín kíxin ts'itjáyanrá kíxin tinkachónkihyará tí sín ángel, tsixro sín. Tí sín a mé chrónkaxín sín tí nkehe éxí kotáchrién sín t'ikonxín sín la nchehnke sín kíxin tí nkehe t'axrjeníxin kja sín ó. <sup>19</sup> A ntá jehe sín la chaxínhya tinkáchónki sín Cristo kíxin jehe ch'án mé tí kja t'etuñhen kaín ni la jehe ch'án

mé ch'éna ch'án jnkokoá cuerpo kuènte ch'án kaín ni la nchek'ánkí ch'án tí cuerpo kixin jehe ch'án t'ayakonhenni ch'án kixin xikaha tjinkaon Dios.

<sup>20</sup> A ntá jahará la ó k'uénkoará Cristo la kuitohérá tí nkehe k'uék'etōan kuènte chjasintajni ó. ¿A ntá nkekuèté naxa tjejorá éxí tí chojni síin chjasintajni chrókuin chexiteyará tí nkehe t'etōan sín? <sup>21</sup> Mé xikaha t'etōan sín kixin jahará chrótsehyará tíha la chrókjónte hyará tí nkehe la chrókuákjáhyará nkehe.

<sup>22</sup> Kaín tí nkehe ntáchro sín mé nixja kuènte tí nkehe tsjeje la tíha mé t'axrjeníxin ikja chojni ó.

<sup>23</sup> Chaxín kixin jehe sín ntáchro sín kixin jína xikaha sinchexiteyá sín kixin tinkáchónki sín tí sín ángel la nchehnkehya sín la ko itsjé nkehe ch'ehe sín cuérpōé sín, kjánchó kaín tí nkehe ch'e sín xikaha la chónkó kixin tjinkitsahya kixin chrókuítóhe sín tí nkehe ntoáhya tjenkayáxin sín.

### 3

<sup>1</sup> A ntá tí jahará la ó tsíxechónkoará Cristo. Méxra chrókuéyará tí nkehe síin nkaya nkajní kixin Cristo la ntiha tjetjaxin ch'án tí tja chjina Dios. <sup>2</sup> Chrókujenkayáxinrá tí nkehe síin nkaya nkajní. Chrókujenkayáxinhyará tí nkehe síin chjasintajni. <sup>3</sup> Kixin jahará la ó ik'uenrá la ntá ijie la Cristo la ko Dios chónthehe tí kjuachón kuéntará.

<sup>4</sup> Jehe Cristo mé chontaxínrá kjuachón jahará la tíó tsokjan tí jehe ch'án ntá kjaxinrá ts'ejókoará ch'án ntá ts'íkonrá tí kjuachaxin jíe kuènte ch'án.

#### *Tí ntia ntaxin la ko tí ntia nixin*

<sup>5</sup> A ntá chrókuítóhéra kaín tí jie tjenkayáxinrá chjasintajni. Ninkexró chrókujasinko jie chojni

chjin ókjé, la ninkexró chrókjuich'e nkehe jínahya, la ko ninkexró chrókjuich'e ninkehó tí nkehe ntáchro asén sín, la ko kjaxin chrókóxrjienhya sín chróchóna sín itsjé nkehe kixin tíha mé yóhe tí chróxraxinkaon sín tí nkehe tsíkjanoya. <sup>6</sup> Méxra tí nkexro titekakonhya tí nkehe t'etoan Dios la tsonínkakohen Dios tí jehe sín la sinchekjasóte sín ch'án. <sup>7</sup> Mé xikaha k'uékjich'erá jahará tí ósé. <sup>8</sup> Méxra ijie chrókuítóhérá kaín tí kjuanínkaon la ko tí nkehe tjak'e asánrá la ko tí nkehe jínahya la ko tí t'antaxínhínrá kichuárá la ko tí nkehe jínahya t'axrjexín ir'vará. <sup>9</sup> Chrókjuich'iyéhyará kichuárá kixin ósé xikaha k'uékjich'erá a ntá jie la ó chrókuítóhérá kaín tí nkehe ntaxin k'uékjich'erá. <sup>10</sup> A ntá jie la ó tsík'ónará ijnko chojni nixin. Dios tinkánchetjóará ch'án kixin ts'ónará éxí tí jehe ch'án kixin jehe ch'án kjuích'éna ch'án tí jahará. Mé xikaha chrókjuixraká chróchoxínrá tí jehe ch'án jína. <sup>11</sup> Jehya tjetoan á chojni judío o náhí o á chojni tsíka xroye o náhí o á chojni tsíkjixín kjín o náhí o á chojni noehya o á chojni ch'exón xra o á chojni t'etoan. Tí nkehe tjetoan la tinkáchónkini Cristo la jehó ch'án t'etuēnhen kaín nkehe.

<sup>12</sup> Dios la tjuèhe ch'án tí jahará la tsíkjeýará ch'án kixin tsinkachónkirá ch'án. A ntá jahará la ó k'ónará ijnko chojni nixin la chrókuíkonóehérá kichuárá la jína chrók'uejorá la ko chrókjuínchehnkehýará la ko chrókójiahyará la ko chrókóninkákonhyará. <sup>13</sup> Chrókóninkákuénhyará kichuárá la chrók'uitjáyahanrá ichrén jie kjuasinhánrá í jnko chojni kixin Cristo la k'uitjáyēnhen ch'án tí jie kjuásinrá la kjaxin jahará la xikaha chrókjuich'erá. <sup>14</sup> Mé



xikaha chrótjuèhérá kichuárá la jnkokoá chrókjuenkayáxinrá. <sup>15</sup> Tí kjuaxróxin kuènte Cristo mé chrók'uetuénhen asánrá kixin xikaha kjuenkayáxin Dios k'uiyahará ch'án kixin chrók'ónará jnkokoá cuerpo kuènte ch'án mé xikaha chrókjuancheherá ch'án kjuasáya.

<sup>16</sup> Tí tan kuènte Cristo jnkochrín chróchóna asánrá. Mé xikaha chrókjuaákohérá kichuárá la chrókjuiñchechéhérá kichuárá kaín kjuaxrexinkaon jína. Chrótsjerá salmo la ko himno la ko canto kuènte Dios la chrókjuancheherá Dios kjuasáya kaín asánrá. <sup>17</sup> Kaín xra chrókjuiç'erá la ko tí nkehe chróntáchrora la kaín táha chrókjuanchaxínrá ihnié Ìnchéni Jesús la chrókjuanchehérá kjuasáya It'éni Dios kjuachaxién Jesucristo.

*Jnkojína chrók'uejóko kichó tí sín tinkáchónki Cristo*

<sup>18</sup> Jahará chojni chjin la chrókjuiñchexiteyéhérá tí xiyará kixin mé t'ichjánxin xikaha chrókjuiç'erá kixin tinkáchónkirá Ìnchéni. <sup>19</sup> Jahará chojni ntoa la chrótjuèhérá tí ichjiánrá la chrókóninkákuénhyará tí jehe tjan. <sup>20</sup> Jahará chánjanrá la chrókjuiñchexiteyéhérá it'ará la ko inará kaín nkehe chrók'uetóan sín kixin xikaha mé tóxrjínhin Ìnchéni. <sup>21</sup> Jahará it'é xjan la chrókjuiñchekónínkakonhyará tí xjaanrá kixin tí xikaha la chrókjuiñchek'áváhyará tí jehe xjan. <sup>22</sup> Jahará chojni ch'exón xra chrókjuiñchexiteyéhérá tí lámoará ntihi chjasintajni. Jehya kixin tí tjejótsjehe sín ó chrókjuiç'erá xra kixin ntá jína chrók'uejoxínrá.

Náhi. Kaín asánrá chrókjuich'erá xra kixin ó nohará kixin xikaha ch'eherá Ìnchéni xra. <sup>23</sup> Kaín nkehe chrókjuich'erá la kaín asánrá chrókjuich'erá xra éxi chrókjuich'eherá xra Ìnchéni la jehya kixin éxi chojni ó chrókjuich'eherá xra. <sup>24</sup> Ó nohará kixin Ìnchéni la sintakitonhanrá tí nkehe chóna ch'án kixin jahará ch'eherá Cristo xra la jehe ch'án mé chaxín Ìnchéni. <sup>25</sup> A ntá tí sín ch'e tí jínahya tsjacha sín tí nkehe jínahya kjuich'e sín kixin Dios la tikonóehya ninkexró ch'e tí nkehe jínahya.

## 4

<sup>1</sup> Méxra jahará lámorá la jína chrónixjehérá tí sín t'ahará xra. Chróxráxinkáonrá kixin kjaxinrá jahará chontará ijnko Dios tjen nkaya nkajní.

<sup>2</sup> Chrókuitoéhyará nixjehérá Dios la ko chrókjuanchehérá ch'án kjuasáya. <sup>3</sup> Kjaxin tjanchehérá ch'án tsjinkitsa tí jeheni kixin tsjanjon Ìnchéni kjuachaxin chrókuinhin chojni tsochrónkaxínni tí itén Cristo. Tí xra k'uénoehya ninkexró mé tjéchinaxián jie. <sup>4</sup> Tsjanchehérá Dios kixin tsjinkitsa ch'án tí janhan kixin chrókianxian jína chrókuàkua éxi tjinkaon Dios.

<sup>5</sup> A ntá jahará la jína chrókuákohérá itén Dios tí sín naxa tinkáchónkihya Ìnchéni kixin kánhyó tiempo síin kixin tsjàkorá. <sup>6</sup> Chrónixjehérá sín jnkojína kixin chrókóxrjínhin sín la chrókónohará chrókuátēherá nkexrí tsixro jnkojnko chojni.

### *Kjuixin nixja ch'ín Pablo*

<sup>7</sup> Kíchóni Tíquico, mé ijnko nkexro jína tjinkitsa tí janhan ch'ehe Ìnchéni xra, mé tsjiji ch'án

tsochrónka ch'án nkexrí tjén janhan. <sup>8</sup> Méxra kuétuanhan ch'án tsjiji ch'án tí tjejorá kixin tsonohará kixin nkexrí tjejóni kixin chrókócháhará. <sup>9</sup> Jehe ch'án la ko kjaxin ch'ín Onésimo mé tjuèheni kichó ni la ko jehe ch'án mé kjaxin jína ch'e ch'án xra, la mé tsjijitsjehe sín tí jahará. Jehe ch'ín Onésimo mé sín chjasánrá. Jehe sín mé tsochrónka sín kixin nkehe sítónhen tí tjejóni ntihi.

<sup>10</sup> Ch'ín Aristarco mé jnkokoá tjechjinakian ch'án ntöechiso mé nixjahará ch'án la ko kjaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhénrá tí ch'ín Marcos tí tsjijitsjehe ch'án tí jahará la chjehérá ch'án kjuachaxin tsjak'e ch'án jína. <sup>11</sup> Kjaxin nixjahará ch'ín Jesús, kjaxin tikítexín sín ch'án Justo. Jehó tí sín a mé sín judío tinkáchónki Cristo, a ntá ijie tjinkitsa sín tí xra tjet'a la chrónkaxín sín nkehe kuènte tí kjuachaxin kuènte Dios. La tí sín a mé imá kjuínchechàna sín tí janhan. <sup>12</sup> Ch'ín Epafra nixjahará ch'án. Mé jehe ch'án ch'ehe ch'án xra Cristo la jehe ch'án mé sín chjasánrá. Jehe ch'án jnkochrín chrónóehé ch'án Dios tjinkaon ch'án kixin kaín asánrá chrókuinkachónkirá Dios éxí tjinkaon ch'án. <sup>13</sup> Ó nòna kixin ch'ín Epafra la tóxakonhen ch'án kixin tí jahará la ko tí sín tjejó tí chjasin Laodicea la ko Hierápolis. <sup>14</sup> Ch'ín Lucas, mé tí ch'ín ch'e xroan, la kjaxin nixjahará ch'án la ko kjaxin ch'ín Demas nixjahará ch'án.

<sup>15</sup> Nixjehérá tí sín kichó ni tjejó chjasin Laodicea la kjaxin nixjehérá tjan Ninfas la ko tí sín tójnkotsé ntöe tjan. <sup>16</sup> Tió tsjixin sinchekuáxinrá tí xroon

tsíkjií t<sup>í</sup> tjejórá ntiha la ichr'anrá xroon sátsji sinchekuáxin t<sup>í</sup> s<sup>ín</sup> tjejó n<sup>ín</sup>ko chjasin Laodicea la ko kjaxin sinchekuáxinrá t<sup>í</sup> xroon tsíkjiíhi t<sup>í</sup> jehe s<sup>ín</sup> tió tsjií t<sup>í</sup> xroon t<sup>í</sup> tjejórá. <sup>17</sup> Kjaxin chenkará ch'ín Arquipo kíxin chrókjuinchexiteyá ch'án jína t<sup>í</sup> xra tsíkjanjon Ìnchéni sich'e ch'án.

<sup>18</sup> Janhan Pablo tjaná kjinxian t<sup>í</sup> palabra nixj<sup>á</sup>hará. Jahará chróxráxinkáonrá kíxin janhan la tjé<sup>h</sup>ji<sup>na</sup> la Dios mé chrókjuintayaonrá. Amén. Ó t<sup>jen</sup>.

**Tí Nuevo Testamento cuènte Inchéni Jesucristo  
C'óna Nquìva  
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

**Copyright Information**

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Popoloca, San Juan Atzingo

**© 1982, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 4 Mar 2023 from source files  
dated 29 Jan 2022

b9b09122-b3f6-59f0-9594-749907b32b5b